

舜水遺書

一
函
十二冊

舜水文集卷十三

明餘姚朱之瑜撰

答問一

答源光國雜問

古來取士其道惟漢爲備而得人爲最盛治法爲近古自唐以降始有解試省試之名而廷試起於宋朝張奭之子以曳白登科而題名強半爲執政親屬舉子誼譁天子始親策之於廷故曰廷試此三試者惟明朝爲大備唐雖設解額而節度廉訪觀察轉運等使俱得自辟士署爲幕職考績而陞爲朝官士子亦得竟詣大學舉進士進士者省試也每年一舉試者甚少而得第者亦復寥寥進士科旣已得雋又復舉博學宏詞等科而後得官故自不同宋朝稍近於我明然分天下爲軍軍府至爲煩多故解額亦自瑣屑大明分天下爲十五國南北兩京爲天子京畿故不言省而十三省乃中書省之分署故曰省浙江江西福建廣東廣西山東山西河南陝西四川湖廣雲南貴州爲十三省合南北二京爲十五國三年一大

比子午卯酉之年大集舉子於省會朝廷差京考二員就其地考試而房考則督學官自行聘請閱文中式者爲解元合次四名爲經魁又次五名爲亞魁又次及末爲文魁鹿鳴設宴此卽禮之賓興而艱難尊寵過之省試者南官之試也南官者禮部也禮部尙書侍郎二員爲貢舉官故曰省試亦仍唐時中書省門下省尙書省試士之稱秘書者監郎丞俱小官不與此數或時承乏典試亦不此以省爲名會試者會天下之舉子於辰戌丑未之年而試之於南宮中式者爲會元餘十七名爲會魁而通謂之進士瓊林設宴廷試是天子臨軒策士宰輔閱卷進呈對廷讀卷京兆設歸第宴故曰廷試非以翰林院爲廷也翰林院官特充房考諸官耳

取士唐朝以詩或以賦宋朝以賦以策明朝初舉亦甚簡易後累年更制定爲初場試制義四書義參篇經義四篇合七篇舉子各占一經不許有兼經者二場論一首詔誥表

內科一道

判五道三場策五道而廷試策自爲一種不與射策相同

初三日世子介弟就見前朝謂僕爲翰林學士答曰僕非翰林學士乃明室一書

生耳介弟刑部君謂上公疑僕有隱情僕則何敢不得已以詔徵一節對之此二十一年在日本未嘗一言及之者今復言僕爲狀元此言不知何來夫以明朝之制狀元初授爲修撰十二年考滿爲諭德若或九載陞遷僅得中允又三年而爲諭德贊善又三年而爲庶子又三年而學士前後已二十年矣狀元擢英俊之巍科翰林學士爲清華之首選而人士之冠冕其舉動係天下觀望豈敢一毫自輕若使僕二十年身受皇恩不能與國存亡而轉展貴國以偷生旦夕則與犬豕何異尙敢覲顏於上公之廷而視息於人世卽使僕受明朝守令微官食明朝儋石微祿數日乎亦不得至此矣僕以上公爲能尊德樂道故不自揣而遠涉至此上公儻能更治善俗經邦弘化謹庠序之教申孝弟之義而爲萬古之光以僕之所聞於師者庶或可以贊襄萬一如以其狀元學士也則視僕爲非人矣言此可勝嗚咽不禁淚下如注此誠道路之口誤之也至於同年進士及姓名所射策數目并策題策眼僕若作僞豈不能立構以給台臺台臺亦何處覈實而證其非耶進士以三月十五日廷試十八日傳臚天子親筆書第一甲第一名某人等字屬

有黃榜張掛禮部更有題名錄緘縢而付該司收掌所謂狀也元卽元首之元所謂君恩賜狀頭可證也狀字與壯字形聲俱近寫榜字製端方韓人之來者無學或者一時誤對而固執以飾其非耶自漢及今皆云狀元考之書史未聞壯元之說韓人亦何所本而遽以爲大魁之號且三韓小國何敢創立異名況壯頭者天下之變語耶必不然已

科舉有甲乙前朝進士之試百人之中以一二十人爲甲榜授官從優二三十人爲乙榜僅得出身所謂第甲乙者此也謂品第之也其餘不及格者駁放回藉後試聽其更來明朝之稱不然第進士者爲甲榜或言兩榜或言甲科中鄉試者爲乙榜或爲一榜或言鄉科更無幾品與名件

僕系出於邾後更爲鄒秦楚之際去邑言朱漢興流轉魯魏之間始祖爲朱暈漢丞相也後有朱輔朱穆亦爲三公穆之直聲震於朝廷而吏治稱之入國初先祖於皇帝族屬爲兄雅不欲以天潢爲累物色累徵堅臥不赴遂更姓爲諸故生則爲諸及耐主入廟題姓爲朱僕生之年始復今姓僕族人謂寒宗爲晦菴先生之

系其子爲餘姚令故留居於此持其誥勅畫像家譜來證中間惟有一世不明白
舉宗盡欲從之惟僕一人不許謂一世不明其不足據便在於此且子孫若能自
立何必文公如其不肖雖以堯舜爲父祗得丹朱商均耳寒宗入國朝來登鄉會
榜者七十九如以僕徵聘勅召冠之則八十矣貴國之法隻字片紙亦必簡閱少
有違礙一槩投諸水火墓誌行狀何得携來且先人例應諡葬以國亂倥傯大典
未及舉行故諸事草草耳

聖廟卽學校也中爲聖廟西爲明倫堂北爲尊經閣東北爲啓聖宮或西或東爲
射圃以較射爲義故曰校也每府每縣必建學立師衛城建學者少故通計止千
餘所

中原區畫大都從禹之蹟周十二州虞亦肇十有二州而地之廣狹則異自邦畿
以至荒服大約六千里周公制禮建侯有五分土惟三不及三等謂之附庸千入
百諸侯自治其國徹土爲糧而天子職貢有常故當時無大富大貧之病漢以天
子之半封齊楚吳其制無度小者萬戶侯亦諸侯王自割其地以侯其子弟耳每

戶丁壯少亦不下十人故常抽數人從軍非以一夫爲戶也後來田得賣買不授公田亦無一夫百畝之制矣

明朝國初分封有前十王後十王其末復有四王如秦晉燕周楚齊潭魯蜀江等是也及繼世天子次嫡庶子皆有分封長則就國祿有常經而不治其民故不問其地與地之所入大略親藩皆富如魯唐衛皆有分是也功臣大者封國小者侯縣或鄉皆聚居京師衣食縣官不得之國理民富者絕少

周官之法固如來問然周朝治畿內耳故三百六十而已足明朝文武內外皆朝廷命官其數何止萬許至於三公則不惟其官惟其人德不足以居是官則缺之九卿以下則咸備也僕受業師爲慈谿契立李先生早世其後爲上海爰啓朱先生吏部左侍郎殉虜難少治毛詩今三年讀禮二十一載流離荒廢二十四年亦不足以言專門矣

卜筮聖人所以教人今太卜詹尹之官雖廢九江之蔡雖不供而其法則尙存所謂灼龜者是也筮短龜長故優於筮耳筮用著固以聖人之慕著爲貴然聖人暮

田不甚廣而叢生百莖者亦復無多今但取蒿蕭之莖近似者以充之然未有用竹者

答源英光國問先世緣繇履歷

先世緣繇

前月初八日伏承面諭謹將先祖父官階緣繇開具呈覽

高祖處士未有官職

曾祖

諱

詔號守愚皇明誥贈榮祿大夫先祖諱孔孟號惠翁皇明誥贈光祿大

夫

此外連讓三恩不受復有二次登極軍恩不列

先父

諱

正號定寰別號位垣皇明誥贈光祿大夫上柱國大闕兼太子太闕兼

闕前總督漕運軍門未任

祖父遭世承平無所建樹濫叨國恩循至大官今子孫又碌碌禍當變革不能闡揚先德恐清朝傳記必不序及承命諄切腆顏臚列耳

履歷

本年正月初五日蒙諭開明履歷謹將履歷緣絲略節開具呈覽

恩貢生壹員朱之瑜年陸拾參歲絲南直隸松江府儒學生浙江餘姚人於崇

禎闕年闕月蒙提督蘇松等處學政監察御史元闕薦文文武全才第壹名到禮

部禮部貢筭有德茂遼東之管等語崇禎拾陸年拾月蒙欽差鎮守貴州等處

充總兵官右軍都督府署都督僉事方某辟監紀同知不就崇禎拾柒年奉詔

特徵不受弘光元年正月奉詔特徵不受本年肆月卽授就家拜官江西提刑

按察司副使兼兵部職方清吏司郎中監鎮東伯旋晉監荊國公方某軍不拜

凡朝廷徵聘不論彙徵特徵不論有無差官禮當先下撫按撫按抄謄詔旨星行

所屬各省行布政司兩京移會京尹兩直隸行道府預備羊酒彩幣重者欽差親

輿立纁迎入布政司及府或者竟輿到門見任文武大小官員齊集開讀敦趣就

道本官生處士或有抗志尙煩周折此時朝政紛然百事草率如此盛舉不考憲

章初下南京繼至蕪湖第三次亦就南京不關撫按衙門瑜故得直行其志差官

理屈不能迫促本年參次蒙恩隆武參年闕月欽差恢剿直浙掛闕將軍印少師

永歷貳

兼太子太師賜尙方劍蟒玉招討大將軍威虜侯黃某承制授昌國縣知縣不受
本年拾月又蒙題請監察御史管理屯田事務不受本月聘請軍前贊畫不就監
國魯伍年正月安洋軍門劉世勳疏薦監紀推官不受隨蒙署吏部事吏部左侍
郎朱某擬兵科給事中旋改吏科給事中不受隨蒙禮部尙書吳某擬授翰林院
官大則坊諭贊允小則修撰編簡乘命未下再三力辭蒙允未知的係何官不敢冒填本年參月蒙巡按直浙監察御史掌
河南道印王闕薦舉孝廉立刻疏辭疏稿現存監國魯玖年參月欽奉肅敕特召敕諭現存
謹膳黃奉覽

通計徵召薦辟除擬除元院疏薦外凡壹拾貳次始終不受此時天下大亂憲綱
蕩然前後不相聞知外內不相炤會況瑜一意弢藏嚴禁家人子弟不許一字宣
露止稱生員後因監國魯王駐蹕舟山間與朝會理合開具朝單恐涉欺君罪不
可賞是故酌量其中權稱貢生猶然隱避初意所以連次授官或京或外倏高倏
卑殊無倫次深貽識者之譏其間薦王官銜疏薦年月亦聊具大槩不能詳記蓋
之瑜少壯家修本志功名鍾鼎痛憤儉壬構禍立見社稷傾頽幸邀兩次特徵雖

百年鉅典遠勝於科目貢舉然顛厦非一木所支大川豈一人攸濟且救焚當豫籌於曲突之先枝柱必無補於棟撓之後不得不忍情辭遜原非欲沽名養高高明白能洞察毋煩瑣屑具陳卽今逋播貴邦開明適以辱國旣承台命諄諄禮難任情默默略節奉覽舉筆涕零醜虜匪茹穢汚中夏不能報仇復國深媿非人豈敢裂冕毀形大羞父祖近見海濱擾擾不堪共賦於無衣獨羨貴國彬彬思欲托身於有禮顧忠臣義士原有國者之所樂成念秦穆晉文知圖霸者莫與比烈儻借丘園一席之地自鑿自耕庶徵培植累世之恩不降不辱且瑜多方晦跡事勢久則必明他日中國復興未必非友邦輯睦所係更希涵鑒不盡敷宣

答源光國問飯含

本月二十一日恭承明諭謂威公飯含以不忍啓視故使人含恐爲非禮之瑜對曰大將軍臨小斂大斂則大將軍親含上公於左方啓巾若使大臣含斂禮亦如之不然禮宜上公親含今考雜記一條註曰大夫以上貴使賓爲其親含恐尸爲賓所憎穢故以巾覆尸面而當口處鑿穿之令含玉得以入口云大夫以上則諸

侯可知已之瑜向謂文公家禮非諸侯之制不足據也今茲所對猶是拘於家禮耳上公理合使賓不爲非禮端此奉聞諸侯飯含七具非三錢也此則家禮誤也

答源光國問儒臣官號

一本月初四日承命察上儒臣官號茲擬一名銜奉聞惟希裁定

司經

司者典也專也主也職也

惟此似爲雅正明朝有其局而不設其官即以此命名非爲

僭踰非此外司業亦可但係朝廷職官且司業爲少司成官已尊矣或不便用再次爲助教

詩經司經音韻皆同今既稱周易尙書或稱雅頌司經或風雅司經或四始司經

謹將翰林院官及諸侯王府儒官開列備覽

一詹事府 謂之宮詹

詹事

少詹

府丞

或時有外官爲之者

主簿以下不載

一春坊

謂之宮坊

左春坊

有爲大學士之時

右春坊

一翰林院

學士

侍讀學士

侍講學士

侍讀

侍講

庶子

諭德

贊善

中允目庶子至此皆有左右

脩撰

編脩

簡討

庶吉士

清紀以下三等多係科道降官

司諫

司直

典籍以下三等非正途官

待詔

孔目

以上三衙門官通移流轉無有定規其展書日講起居註實錄纂脩實錄貼黃脩某書等皆差也非官也至於總裁必用宰相爲之

一司經局

洗馬

洗音銑宮官

助教

以下非翰林官

校書

正字

一國子監

祭酒

司業

監丞

以下非翰林官

博士

進士初授三甲

助教

學錄

進士降官

以上五衙門皆翰林爲之外又有翰林院提督四裔館太嘗寺少卿乃外官

而帶翰林院名銜實非翰林官也

一諸侯王府儒官

教授

學正

訓導

校書

正字

伴讀

典簿

典籍

其長史審理紀善非儒官也間有博士乃前代諸侯王僭擬而爲之非禮也
明朝則無此

審府官名均似不相稱

答伊藤友次問喪服

親臣與子同服然壓於尊則不敢如制命之服然後如制終有降損

尊謂父或祖母在上也祖母

母本生父不在此例蓋諸侯承父之統與祖爲休也

喪服用三升麻布

謂不漚不練未經灰煮者

青黑色日本無喪制恐

無此物若台臺有意於禮卽用生紵布亦可用生白木棉亦可賢者爲之後當有漸復古道者承問率復

答野傳問

孟子云盡信書不如無書非不要書也但當以理推斷不可刻舟求劍耳書如人之杖老者力不足者倚此而行若兩足不能步履而竟以杖行此必無之理也陶氏輟耕錄云蒙古入中國中國方有木棉是鑿鑿有據也然書籍言布非一豈盡非木棉乎猶曰無有指實漢公孫弘布被必非麻也葛也紵也杜詩云布衾多年冷衣鐵嬌兒惡臥蹈裏裂必非麻紵葛爲之矣是元以前中國已有木棉矣深衣爲次等禮衣取其冠裳天子諸侯公卿皆服之麻旣不可爲己紵葛遇秋風交則卷如繩索此豈冠冕禮服無冬無夏可以服之者乎不辨自明矣褐爲毛布註者